

箕

谷

詩

鈔

貧谷詩鈔卷十九

海昌查 揆梅史著

甲申正月五日迎春作

一路青旗影翻飛出郭行魚龍真退舍雞犬漸聞聲冰泮春
田麥霜寒曉擔飭陽和誰感召應媿此專城

朱勲楣觀察

紫

勘河至縣有詩奉次原韻

永安隄畔過蕭檄不成鄉燕認流亡屋魚游協入場驚心搖
大樹著腳怕巖牆使者心飢溺流言未許嘗

郊行見杏花明日已寒食矣

隔牆紅映轎窗紗二月江南憶歲華說與東風輕著力倚雲
生怕浣飛沙

沿籬涖水小縱橫棗園蔬枰掩映生社燕不來春雨少蠶吾
城外作清明

三月將盡春事索然作懊惱二首

苦寒天不許春融孤負闌干番番風寒食清明多過了可能
吹得一花紅

醜石枯槐點綴鹿閒庭三月不生蕪黃鵬自是啼難到并箇
蠶聲蝶影無

潘功甫中翰以新刻見貽却題其後四首

十年東閣別駸駸一卷瑤華慰獨吟如此高寒何境界閉門
風雪萬山深

飛葉泠泠足躡回文章爲弟定須才不知大酒肥羊社可要

梅花細嚼來

字字都從數上過
斲輪穿井奈難何
年來勘破都官集
校與西江瘦句多

鄭衛無從近國工
十分修潔見宗風
世間珍妙衣多少
半在莊嚴廁舍中

和陶鳧香觀察詠物四首

老樹

老矣蒼官古色酣
此才無用用應堪
曾棲風雪堯年鶴
記駐滄沱漢將驂
盤錯孤根非易託
崢嶸晚節倘能諳
桓郎短盡英雄氣
祇解攀條泣漢南

老石

丈人峯小映清尊比似靈光塊獨存玉筍班行皆後輩犀株
頭角當諸孫苔文亦作千秋想雲氣如還太古魂別有吾家
袍笏拜鬱林奇字尙堪捫

謂巖雲石

老屋

杜陵曾乞草堂貲家術依然有所思聖白題餘耆舊句牡丹
看到子孫時盛衰門外桃符換家世堂前燕子知輸與華嚴
樓閣樣朝朝初日照罍恩

老墻

秋雨層層著土花百年圯墁問陶家頽然懶與高墻競
猶扶壞棟斜崩剝杜陵容過酒糲糊蕭字尙籠紗記來日下
逢朱鷺薜荔秋陰上畫叉

往在都門朱野雲爲作壞墻小景絕工

舊城旅次

小簣蓬廬戢夢魂勞心猶逐日車奔觸牆牛角成公字破屋
鸞釵寫漏痕菜把價高慳赤仄茅柴味劣餉黃昏河干日被
鳧翁笑尙有狂奴故態存

緒龍河王次作

未許清漳保障行羈愁閒著不寰城帆隨漚水歸西淀山擁
寒雲遶北平誤讀河渠成左計轉疑鷗鷺有前盟黃金浪擲
投虛牝謗息終愁費水衡

薄暮自河上至舊城

稅駕輒終日車箱每苦飢近村歸馬疾過淀老魚飛路暗沙
猶白夜明星尙稀煨爐呼濁酒暖可抵寒衣

客舫填詞圖爲陶觀察作

逋峭居然許散愁
閒紅一舸狎江鷗
夜深去弄桓伊笛
吹過垂楊水磨頭

相逢張史定褰裳
一洗箏琶未是狂
莫更江湖問陳起
范尙

書早賞鄱陽

謂蘭泉司寇

秋色垂虹幾泝洄
潛魚出聽綠萍開
客愁似水閒無著
柔艣分明記得來

髯也清狂舊卷留
當時題句滿曹劉
只輸攜得雲郎去
一樣功名似馬周

禱於昭龍王祠
越日得雪喜賦二首
時已逾立春二日矣

六時禪板和神弦但乞祥雲下梵天小祀未嫌修漢臘奇寒
原不礙堯年羣靈自鬱飛雲棟萬竈爭開種玉田日日縣門
懸榜樣太常齋禁六街前

獸炭圍爐酒不辭繽紛天與土膏滋卽論霖雨功何讓却趁
春風到略遲百堞雲陰仙鶴聚一犁花影老農篩飛書夜半
衝泥出未許郵籤駐少時

郡縣得雪由六百
里馳報大府入奏

寄琴鳴頻迦

悔惱何爲者休言舌尙存壁難忘鼠輩杯已怯蛇痕城迴風
飄柝人稀雪掃門所慙僚吏笑皎皎亦昏昏

沈季壽

清

刺史載酒尋詩卷次自題韻

九經有庫豈真貧著錄驚看已等身醉墮揚州仙鶴背暫拋

許鄭作詩人

杜牧江湖醉夕曛拓來金戟又燕雪尋詩我亦宣城去曾醉
青山小謝墳

綠楊城郭畫中詩可是瓊花似雪時磊磊船頭三百甕也應
饒煞老篙師

寄吳更生州倅

長卿

京洛歸聞未幾裾紛然歲晏孰華予此生休已成倉猝來日
難還問起居帳下魂偏虛宛若鱸頭人轉弔相如疎狂杜牧
今何似風雪曾無尺素書

甲申除夜作

衙鼓無聲夜未央客中節物小許羣船鼓鉦櫓津沽遠馱販

醯醢潞澤香薄宦乍如爭博進早春先欲正農祥後堂獨共
閒琴鶴酌汝聊酬一歲忙
畢濁低昂逼歲闌放鳩俗近趙邯鄲清漳徙後魚龍靜小雪
飄餘薺麥寒著眼光陰成過客回頭畚鍤笑麤官乞漿得酒
何僥倖醉畫桃符與細看

新年試筆

滿庭簫鼓放朝衙插勝渾忘髡已華燈社遨頭先替月筆牀
判尾祇催花樗蒲戲了消寒局餽飫方鈔賣餅家狂得六街
塵似霧到門爭聽馬鞭撾

正月十日夜抵郡城明日爲馬總戎壽觀劇踏雪回縣
籃輿夫亦腳踏跚塵上爭愁后土乾淦水遶城冰未泮魴鱉

滿市夜方闌銀貂戲下窺都護蒼鶻尊前舞契丹不怕重門
閉魚鑰醉來衝雪踏春寒

嘉慶壬申秋汪已山

敬

訪曼生於溧陽桑連理館遂偕

聽香小曼同游龍池曼生爲作圖紀之越十年道光癸
未僕過袁浦已山出示屬題攜以北行又三年矣屬有
南還者爲題其後歸已山

庭烏隨客散枯桑黃葉寒葉飛下瀨去蒼茫沆水寬其上
媚
爐峰潑翠何時乾中有故人筆妙絕青林端龍池跳白雨點
作蒼苔攢郭詩與江記文字皆不刊佳游窮腹背健步輕百
盤蕭寺雷篆漫吳碑神識剡捨舟日亭午首路雲紆蟠危亭
愜小極精舍尋古歡泉喧非凡響竹靜無餘癡攀躋力可及

危苦心所拚澄泓浮蜥蜴游詠狎流湍見人了不驚欲釣不可竿別有無盡藏趁此腰腳頑縋幽驚壁蝠觸氣聞林蘭深肩挾鎖鑰神匠窮雕鑽爬搜苟不到竟爲造物瞞當時固爲樂事過覺已殫星紀一以匝存沒還三歎我攜此圖來幸未拋狂瀾三年行篋內一字亦大難遣之歸清閤夜夢猶銅官
春日縣齋卽事

官柳當風學折腰放衙暮暮復朝朝社公雨曉開壇乞廟市花晴汲井澆五色棒驚庭雀散八關齋鬪酒魔消年來已證聲聞果祇被驅毫氣尙驕

三月十一日自郡城回縣喜雨作

已慰雲霓望何愁道路賒真成天雨粟不負縣栽花破塊田

驚雉翻溝電掣蛇豚蹄爭入廟忙煞社翁家

後院雜蒔草木雨後蔚然可觀卽事有作五首

生趣如蟄蟲氣化爲鼓舞要使目睫間渙然發矇瞽枯荻滿
庭院狼藉近廊廡春風醫百草神功起朽腐河朔雖苦寒與
古殊風土時於黃塵間青紅燦可數唯嫌少膏澤尺地多舄
鹵芳蘭但肯生何敢怨當戶

自從漳水徙積塵成高原潤澤氣已盡芳菲何足言然亦非
不毛何至全如髡來者視郵傳去孰惜邱樊朱闌委叢莽禽
鳥鳴煩寃蹴踏勞僕御啄踐到雞豚誰復念生機經營此朝
昏我獨命詹尹筮得蒙之屯亟宜埽荒穢俾著春風痕豈可
因暫爾無足貽子孫遂拋閒院落靳此灌漑恩

負販來武安蠹螭已壓擔搏土培寸芽束筍縛弱苔一一露
華浮微微風色淡待價傾城償買笑泛觴濫挂壁錢無幾垂
橐事亦暫枝葉校短長顏色別朱紺地呼髡奴鋤園倩老僕
勘分塏視高低疏溝審明暗閒與課陰晴忙直廢啖啗狐埋
狐搯之一日再三探

去年秋九月一雨直至今雒雒渴欲死后土乾難任區區凡
草木不奪憂歲心油雲應穀雨麥秀甘如霖旣已慰田野酌
酒臨庭陰丁香方舒條紅薔亦可簪時有蝴蝶來輒被狸奴
擒忍冬與枸杞翠蔓交如紅海棠獨枯枿或言蠹蛭侵牆根
小甘蕉坐待秋雨淋就中誰最佳使我旦夕尋鼠姑纔尺餘
小朶初懷妊晴光一烘開雪艷披瑤林紅藥扶持之婉孌牽

衣襟相看小兒女俛仰橫清琴

瓊裹驢馱來下堂解其縛同此月日時五行無強弱一一好
位置根株各有託風雨亦均調愛護無厚薄須臾暢化機生
枯已舛錯或尙含歲蕤或便舞綽約或如病痿絕或直瘦戍
削華悴竟萬殊此理孰索摸因之悟夙命稟受蓋已各況其
誕種初肥磽隨所著雖復同陰陽已多異榮落紛紛日者言
窮通特穿鑿

送春二絕句

番番花信謝春紅罷蹈青陽拜社公紫燕黃鸝忙過了讓教
布穀管薰風

驢駒還認舊青螭長養功煩吏主持比似中年擔荷重不須

苦憶看花時

白牡丹

玉蕊唐昌見亦愁
蘸來藍尾醉鄉侯
東風爲謝諸年少
富貴居然到白頭

褪盡安妃臉上霞
一般擡舉剩瑤華
輪他黃紫非常艷
多在平泉宰相家

鐵牌行

邯鄲縣西二十里
望井岡有龍祠在井上
禱雨輒應
道光五年夏遣吏往禱
寺僧爲竭井取鐵牌授之言
得雨則別製一牌與舊牌還
諸井牌至縣三日大雨
霑足攷志乘元延祐間已建祠
塑像特不言鐵牌始

未旣感神貺爲詩紀之

東井鐵星何錚錚旱潦敢與造化爭蝦蟇請雨應龍笑俗物
那得知陰晴蘊隆蟲蟲過夏五片雲不壓清漳城自從改道
水東徙勢高土厚窪無坑溝渠利絕憚修復苦待甘澍方催
耕早禾被隴雨尺許豆苗出土纖枝擎灰飛沙湧百草死晚
穀未播閒田平蓁蓁腰鼓開百面叢祠社鬼爭逢迎縣門十
日禁宰割素衣朝夕多徒行祝吏致詞豈不美杲杲但見歆
炎精舞雩禴解一無驗大橫圯兆虛庚庚飛騎忽報鐵牌入
近郭十里聞雷聲焮軒霧駟滿道路弭節已慰憂心惇雲頭
西南轉東北須臾萬瓦皆鏗鳴黑蜮上天肥蠟死辟歷車鬬
蚩尤兵神臯流潤謝元貺三日霑足訓編氓吾初然疑未深

信少見多怪今始驚邯鄲迤西二十里急裝老吏詣宵征聖
井岡記延祐後鹿盧夜轉銀潢橫鐵牌如符許調水驛綱馱
負須兼程牌長八寸博半之上鐫郡縣當官名仙韶梵曲作
導引如有鱗翼隨靈帡或言神龍澤萬物何勞寸鐵投清泠
豈知兩間有至理天道亦近常人情衷多益寡示調劑挹彼
注此權虛盈要須交質足取信不然尺寸誰紛更五金於法
爲水母譬如勘合供使令疾藜不生亭歷菱迴幹年歲行乎
誠作詩紀實告惇史卧聽殘滴喧蕉枌

龍母謠

昭龍祠有龍母像歲旱輒以寡婦舉行城市云以請
雨

朝飛餓鴟暮渴鴉柳條盤綠綰魯髻鴟鳴鴉奈何許寡鵠
去訴龍親家癡龍慳水論升斗羣雌粥粥請龍母中婦挈瓦
盆少婦燒芻狗褰裙赤腳健者誰過市招搖牛馬走龍母歡
喜行劇驂盤游箕畢天東南道逢女魃語月亭是何江斐侍
從無丁男龍母出日煖煖龍母回風謾謾弦獨繭絲吹孤生
竹再拜龍母前雨多年歲熟寡婦無田亦無犢但乞天雨粟
十斛

奉黃石齋先生栗主崇祀兩廡禮成敬紀

攷亭託鄉里戴山如季孟死獲近孝陵祭乃祔先聖特羊
告廡下栗主以樂迎松風憂階圯壁沼耿相映詔謂先生
賢序與文莊並勝國三百年學業亦互競公獨一韋編穿井

得究竟恭惟建言初動以去就諍曰當師上九小人亟宜屏
此事本繫辭精與歷法併六日七分說推筴盡三正後來大
小游軌革絕且箕陽九百六厄遺法尙可偵公直抉突窺刮
垢淬淵鏡演年排魯史詩譜訂毛鄭消長燦爻象治亂迭衰
盛唯在剝復交所望邪正更緯讖京房殊災祥劉向恹奈何
魯陽戈難挽太阿柄辛苦紹絕學慷慨協正命漳海迴紫瀾
狂流不敢橫悚息視豆籩升堂企言行

雨後廣平道中

遄發占朝霽行從蝦蟇東炎歆初伏始霑足遠郊同耕犢槐
花雨藍輿麥蜚風泥濘吾肯憚夙夜慰田功

卽事

接壤區區地頻留案牘綠倉空偏訟雀弦急轉驚蟬都尉搜
官粟窮黎雇役錢紛紛煩搏擊或恐未應然

夜赴鄆城

夜色紛浮動衝埃卽郡城四圍村樹黑一道湓河明考已催
科下功休折獄爭勿疑昏暮至生媿折腰行

與沈心石大令奉陪蕭太守讌集蓮亭

濠水抱灣環一亭峙東北出郭天微明宿鳥尙戢翼客來如
殘星點破亭角黑生恐輦風喧驚起睡鵝鵝須臾簪鳥交卽
次廚傳飭初陽照城根微茫辨香色雉堞上荷盤衆綠壓歛
仄略見葉底花隔水澹無極何如古君子裘裳不可卽方茲
夏潌生郊野藉力蓄豈獨避炎暑亦以省稼穡年年瓜李筵

誓爾一休息

集鳳樓納涼絕句

仙家偏許借樓居著我延涼卧治餘
慎莫被他循吏誤鳳皇神雀史頻書

葉攢鴉點幹蛟蟠六月濃陰晝亦寒
散髻藤牀當讀畫高房山寫夜山看

夏畦霑足叱牛頻一雨都無入市塵
侵曉放衙朝飯罷天容半日作閒人

邯鄲呂仙祠題壁五首

華胥地好欲移家枕底繁華過客誇
我到祠門剛六月夢騎鷗背踏槐花

彈指光陰小劫過睡蛇雖穩奈魔何生防乞與青瓷後從此
人間夢更多

醒尙惛惛况未醒懸厓撒手幾人經狀元宰相橫胸臆休向
邯鄲道上行

同時還有嬾殘忙仙佛多游熱毒場畢竟鄴侯真骨相一枚
煨芋勝黃梁

一笑疑團破眼前歐劉應到枕函邊就中多少開天事紅燭
如椽五十年

夜赴廣平勘案作

暝行三十里車路逐銓鸞暗水昨宵雨遠烟何處山鳴雞爭
旦出靈離渡河還振觸秋期近勞勞夜未閒

豆町瓜區外開方又割方梁亭構瓜蔓楚女訟條桑一角眠
牛地三家逐鹿場買鄰千萬值蠹爾太侂張

七夕

人天離別不勝情君是經年我隔生潑水衾裯垂淚燭更無
舊婢剩梁清

玉京謫滿彩鸞飛見已無緣夢亦稀今日王章頭白盡秋陽
一桁曬牛衣

一年

一年漳水上剩照髣絲多槐莢霜垂串落根雨塌窠癡頑天
不許染著佛應訶休澣容暇日燈寒夜奈何

夜起坐雨

不寢聽簷溜階墀滴欲穿聲疑飛楚峽夢恍泊吳船影事殘
甚歛秋心亂柝傳遺簪忘不得垂老尙愴然

饒陽馮母廟

秋老蕪蕪水不波異軍特起渡滹沱赤眉河朔干戈壯白髮
門閭涕淚多伏劍王陵悲未已絕裾溫嶠媿如何叢祠一角
飄零樹村社猶攜麥飯過

無寐

獨夜不成寐湛然聞見稀曙鐘敲鳥起寒葉捲星飛禪定叅
無漏才籠覺昨非寸陰拋可惜翦燭待晨熹

霧

虛空誰破得彌望似烟屯鳥過方知樹驢鳴覺有村久晴偏

潯潤將曉轉黃昏祇恐多歧路徘徊認轍痕

楊椒山先生祠堂詠史題壁四首

顏筋柳骨掃虬龍照耀何如鐵柱宮自古西京容汲黯更誰
北寺殺陳東蚬蛇有膽英雄氣大鳥招魂慘淡風說與管家
文武道行年四十不忿忿

西內腰輿侍步虛抗章曾不少躊躇驚飛鸞鶴朱雲劍哭散
烟霞賈誼書太息京攸成跋扈本來黃老亦歔歔鋤奸轉藉
神仙力不使輻輳作鮑魚

冰山錄底劫灰多公子休騎欵段過偃月堂開唐宰相上河
圖攘朱宣和倭夷市舶搜金罽邊帥包圍送紫駝此外深文
原未免當時楊沈奈君何

歐刀柴市恨何窮
助衛羅鉗吉網功
流毒真成藍面鬼
孤忠誰望黑頭公
林鄉白簡談何易
袁董青詞老枉工
從此西臺鴈隼疾
鷄鵒毛血灑秋風

醉

不敢尋常醉逡巡
已八年吐憑鐙慰藉寒
剩被纏綿小劫間
何濶多生老自憐
記來謀酒夕蔓草黯秋烟

寓感

一擲全梟爲底忙
枉教筆舌費君房
憐他上蔡牽無犬
漫爾中山獵有狼
淬刃可堪柔不斷
脫鞵無奈飽先颺
紛紛世上譸張幻
多作雲烟過眼忘

道光五年冬何公子

紹曾

以河丞來權縣尉明年春受

代赴大名既別去以詩見貽奉訓二首

紀羣交自越尋常舊聽趨庭下馬當過嶺詩多才子氣到官
例諱酒人狂藍田圖畫新廳壁京兆文章古戰場與話當時

四公子平原祠宇入蒼茫

邑之西屯有平原君祠墓

歸路天雄百雉高一時伶藉酒軍驕尊前駿辨臧三耳歲晚
人情拔一毛風雪春鎗圍小縣魚龍沙磧偃驚滯漢廷最重
宣房績壁馬看訓使者勞

邯鄲懷古六首

武靈奇服動諸侯爭說函關渭絕流西帝漸聞秦鹿大東周
無恙宋鷄愁洗兵曉過烏桓水割地晴開上黨秋一檟劫灰
吹不盡鮑魚雀數兩沙邱

漳水猶流百戰聲雄韓雌魏各強鄰一時羈旅多名將絕代
鉛華讓賈人高會君王爭擊缶行沽酒吏尙輸縉笑他剩贈
蘇公壁却賺秦庭設九賓

一赴澠池敵膽寒上卿口舌任瀾翻縱橫易解原非計將相
能和已大難客有魯連知蹈海事如曹沫許登壇分明智勇
無遺憾莫作梟盧浪擲看

武城封記孟嘗曾乞援春申又信陵歌舞叢臺花窈窕弓刀
幸舍氣飛騰鷄鶩冠切浮雲上玳瑁簪寒歆血凝到底敦槃
公弟貴買絲欲繡竟誰能

輪臺一悔已無窮暮氣彷徨五柞宮乍遣神君銜義縱况堪
巫蠱起江充掖庭令許更衣入傾國名徒挾瑟工尙使泉鳩

無廢置可勞負展畫周公

卜肆逡巡鼠穴旁
懷車男子與興亡
居來強趙真奇貨
詭到諸劉卽假王
誰識金刀徵讖緯
却看銅馬閱滄桑
春風甥館彈箏夜
尙憶蕪羹豆粥香

卽興

四鄰多躁擾
小縣漸荒涼
風過覺沙靜
雨餘聞草香
廢田亡故瀆
飢鳥怨空倉
無限憂生意
中宵自激昂

沈心石大令招同蓮亭看花以雨不果往翌日寄心石并簡敘軒觀察

一雨銷百憂
如藥回沈疴
飛來雙赤鯉
導我尋鷗波
上言長相思
見少別苦多
下言遵渚北
萬柄浮新荷
不覺腰脚頑
忘

此髣髴似聞四蹄熱騰擲廐下羸逡巡失清景興盡祇頃
俄夜復夢見之明鏡周城阿雲霞地湧出鱗羽仙騎過萬態
綠鋪海衆艷紅攢窠稍稍涉遲疑冉冉成蹉跎動云有所待
後悔如君何豈獨看花約負負良已多借君清涼境移君安
樂窩倘將就我嬾那畏天滂沱

敘軒觀察寄示蓮亭雅集詩并以僕期而不至爲疑卽
次原韻

酒旗三星如建牙風月可買不可賒摩牋已辱急足遞率醪
先聽長鬚誇抱城一角溢水漫含漪六月溫風嘉乍喜花事
蠟屐盛但恐酤價糴邱加去年記尋沙岸鷺有客同繫風亭
蹢於深苦愁行潦縮葉稀未許驕陽遮翩躚尙想水仙操憔悴

倅如過宮人斜送更時序蛇掣電別開世界鷗驚花奈何朝
三公賦芋坐使夏五期逾瓜佛說因緣自有在客且靜聽慎
勿譁藕孔無難現實相畫壁定要籠輕紗先生有詩轉催雨
此花出水如浮家紙上奕奕欲飛動道旁嘖嘖生歎嗟却將
餘事付殘瀋更煩芳訊貽疏麻鹿官無賴鮎上竹塵牘失笑
蠡開衙所慙陽春和白雪何取零露懷蒼葭徐陵熱幸滌滯
暑范泰交或生雲霞亟奮豪情屬脂秣拚指俗眼娛鉛華碧
筒泥飲計良得角弓毋忘詞不差鏡中花影靄香霧尊前詩
味渾醖茶况堪豐澍慶四渥肯嫌布鼓教三搥便擬蛟毫卧
作席可憐螳臂撐當車

越日赴郡同沈觀察蓮亭看花疊前韻

宿諾不踐負齒牙興發那畏修途賒房心月出免欲語沼溢
水濶魚爭誇薛春游本好事慣劉曉行况幽討嘉近城蝦蟆
更歷亂溯流葭菼叢交加主人方捉牀上蜨客子已繫門前
駒亟覓茶具不脛走喜剩布幔當頭遮堂餐生怕日趁午烏
帽却被風吹斜何妨折腰問窈窕未肯老眼甘昏花珊竿閒
投北溟釣翠椀涼沁東陵瓜悠然但覺蒲葦遠靜極轉厭鶯
鳴譁誰歟漢臯乍解珮仙乎越女初浣紗其北講舍二三子
此外野處八九家吾曹能來良不易鬚眉如此還自嗟年年
走避日底影人人嗤點蓬中麻公尙賈讓滯上策僕敢韓愈
干南衙高懷浩浩波委壑急急景冉冉灰吹葭并無感慨忤塵
俗但見顏色酣流霞坐來妙葉當傾蓋鬪將秀句殊鼉華槐

柳相映夾堤立稔黍未校豐年差公榮肉食不勝酒長孺骨
鯁偏宜茶隔陂揮手惜鷗侶薄暮分道迴馬拋到家苦被小
婦笑芙蓉壓匾歸來車

夜過邯鄲

不遣當關覺輕車趁曉行霜枯如帶水賊裂不褰城肆閉王
郎卜絃虛趙女箏黃花誰識曲無寐聽雞鳴

黃花曲見白香山邯鄲詩

聖井岡禱雨作

紺宇垂何代莊嚴逼翠微伏流通海眼妙相著天衣塢映紫
山曉窗窺青鳥飛井楣頻乞與真似得標歸

秋色

悲秋還欲寫秋光直向倪迂筆底商大火流餘猶絢爛出郊

迎處卽丹黃本來搖落難爲雨亦有芳華祇愛霜一種荒寒
看不了楓人相對醉重陽

暮色

紫絲纈紛萬狀鮮杜樊川愛晚晴天人歸北郭醵錢社帆憶
西湖盞飯船一晌便拋鐙影外百年多在鬢絲邊乞他小米
數文筆如睡山容喚早眠

風色

過簫聲乍聽依稀漸覺塵霾欲掩扉驚蜨亂穿衣桁散落
忙趁酒帘飛搖來芒角星多動偃到芳菲草不肥好與相風
鳥寄語挂帆時候要知機

寒色

嗶啾聲聲怨紇干一番裝點作輕寒雪從叢葦梢頭下秋在
歸鴉背上看花影澹疑晴亦凍夕陽紅似濕初乾相逢尙有
堯年鶴與撥爐灰話夜闌

曉色

紙窗明滅且須臾更斷蝦蟇隙斷駒沙路明如微霰聚秋河
浚到一星無雙栖未起梁間燕三匝猶飛屋上烏多謝幢幢
棹燭影寫來殘夢未模糊

霽色

新烟浮動碧無涯一壺晴光上畫叉渡水歸雲猶戀樹出林
啼鳥尙憂花初陽圓作三分暈餘潤輕拖一縷霞見說驛門
車似水軟紅連日不飛沙

行色

取牴纔與記初程強喚劉郎作曉行烏帽漸看陂隴隔青帘
相送夢魂驚高低林影搖鐙影遠近雞聲間鐸聲七十五長
亭外路驚黃楊柳黯江城

歸色

隔夜先除逕上苔下車鬚髻各相猜生來馬角人驚看去後
桃花手自栽弛擔牆頭爭過酒到門衣上尙飛埃黃金不似
閒芳草肯趁天涯送客回

銅鼓行

鼓爲鐵
珊所贈

慮隤二尺闊三之其旁橢圓寸有奇高乃逾咫深較補重三
十斤其色黧垂龍拔角剝有耳遶豕刳腹留其皮雲雷刻畫

似款識年月莫辨句讀遺吾友汲古過洪趙持贈還欲質所
疑或言跼蹐墮蠻瘴此鼓乃出西南夷馬流至今有遺種鑄
之合儷靈姑鉞或言南征恣擒縱鞭撻檣杙咎窮奇凱歌振
旅告郊廟遺製直似銘功爲傳聞異詞何者是誇大無足增
毫釐頑山惡水孕獷悍深坑老礦鬱陸離銅山四百六十七
荒裔所產或倍蕤銅船銅柱冶未盡尙餘銅馬元九遽譬如
老蚌生合浦珠官置郡直不貲地所不愛取求便徼外事豈
工倕知夸師維將論世闕竹王桂父誇叢祠得此每以樂侑
食小亦徑丈大倍之迸雷鎚險奮椎鑿鑽燧流汞窮鑄劍中
間尙有楊邁金質淳品貴分崇卑豈徒軍旅思將帥略如宗
祊尊鼎彝不然上殺獲無算詎少師象與兕犀陰陽爐炭燒

混沌青紅粉墨圖蒙俱膽水幾年繡入骨蠻釵何物清醒脾
方今聲教訖北戶但有馴服無獠狂欲攜此鼓震關塞長纓
看繫諸昆彌并不建鉞參偃旗夔夔還逐春燈嬉

說詩示兒同

詩於天地間醞釀無不有天地不自言忽然脫吾口雄聲奮
風雷雌聲擲瓦缶下至野干鳴上擬獅子吼洪纖各異響雷
同轉無取往者東家婦端正唯鼻醜試與鄰女易圓玉截無
垢美則信美矣安著各不受徒使大痛苦重爲婦所詬但當
率胸臆於以罄抱負無爲見異遷幸勿逐臭走
氣激風過簫勢激電流矢苟非所甚迫著語不壓紙所以古
詩人恒如不得已心苟無所觸慎勿強議擬谷幽鳴鶯遷候

至草蟲起欲過旣不能未知誰所使我悲人亦悲我喜人亦喜丹青爛腸胃宮徵嚼口齒何論古有無但通情彼此因之別真僞彼哉構形似

賈生能文章良不在慟哭白傅善諷諫亦非肆謗譴少年甫操觚輒便事徵逐藉口溫與李曾不少媿怍豈知十八衛何等好胸腹徒以輕薄名被誣極挫衄使非湖海才千載安可暴奈何諸後生沈溺苦不速爾寧跼寸步勿羨此驂服凡我所弗免爾當思之熟立言隨所遭榮辱於焉伏感激似易工骯髒頗非福轉喉一觸諱正坐未三復傷時與迂物遠之如虬蝮肫然抒其懷庶幾見義處

貧谷詩鈔卷二十

海昌查揆梅史著

西陲用兵閼邸抄作

妖孽秋含穢雌風晝作昏祲除方退舍反側尙游魂脫兔成
三窟連雞逼大宛先驅諸伯克勞爾鑿凶門

使者承恩出頻年乘障行雪深都護府星落受降城酒定葡
萄熟裝誰蕙苒輕至今勞撻伐辛苦事專征

反噬磨牙久披猖蔓艸逾幕連西突厥路塞北單于竟敢燒
亭障居然援鼓桴生成甘自外拒斧且當車

將軍來隴蜀開府又河湟飛渡黃牛峽橫行白馬羗到應窮
穴鼠歸自殪天狼誰擅燕然筆穹碑照大荒

鷄薦尙書省鑣馳大漠秋天高鴻北嚮地迥水西流已斷匈
奴臂先懸鄯善頭儲胥良不易應進富民侯

肘後黃金印揚威過浚稽兩年前出塞萬里大安西劫火銷
霖雨先聲壯鼓輦視師丞相度早晚二庭犁

視膳冰天近談兵月窟遙世家李都尉年少霍嫖姚况有漁
陽騎相將漢使軺爛銀裝背嵬新挿侍中貂

挿羽軍臺徧傳烽闐圍遐蟲沙多謫宦兵火近仙家謾道河
源絕虛言漢道遮九重方赫怒俘馘到渾邪

純廟威棱在疆開絕域寬鳴鞭紅柳暖頒歷雪山寒百戰唐
回紇三朝天可汗肯因全盛日玉斧劃河干

宸斷多成算紆籌已預防薦賢褒魏尙克敵倚陳湯轉饒行

尤亟輸邊議未妨捐租還下 詔藩服更騰驤

勁旅過畿甸遄征驛路開犬閒無吠夜草靜不驚埃內帑黃
金賤邊情白帽催所期風雪裡飛上李陵臺

山餒如茶火巖冰鬱陣雲請纓五屬國分道六將軍水草張
騫識屯田鄭吉聞春風吹浩蕩彈指靖餘氛

自郡城購得菊花徧置庭院對酒有作

解縛分栽老瓦盆安排多著古槐根搜尋郊島新裁句點綴
羲皇舊夢痕插架編宜叢篠細挈瓶澆怕井泉渾潘郎只愛
閒桃李那許西風掃郭門

終朝忙煞負長饒野蔓秋蕪一例芟分俸且償村市值餐英
未許肉人饒開雖遲暮偏難狎賞到荒寒越不凡我欲東籬

通一笑年年同此老頭銜

盆菊一本白者最佳寵之以詩二首

三徑閒閒未就荒一般狷潔鬪新涼
攜來北地何嫌瘦鑒到西風不肯黃
幾日籬根驚積素有人霜下作重陽
怪渠秋雪分明樣賺與谿蘆校太狂

歲寒顏色近如何未許緇塵到澗阿
似此風霜惟汝獨讓他朱紫別家多
但簪衰髻須燈見欲寫秋痕待月過
倘道連畦無點染老夫相映醉容酡

菊自負販束縛而來枝葉頗悴戲以酒澆之越宿欣然
向榮同人擬作醉菊詩喜爲之倡

顛顛頻頻酒一尊東籬真醒未招魂
移來彭澤初無恙澹記

杭州舊有痕晚節何緣耽白墮酖顏爭欲鬪黃昏醉鄉側畔
紅萸外五斗如今定許髡

爭傳灌頂有奇方開徑朝朝乞釀王秋到叢殘工示疾風吹
酖酖漸聞香澆愁釀抵登高水消渴酖兼隔宿霜苦憶年年
成束濕糟邱臺下漑餘芳

自葉流根沃幾回幕天席地看花來沉酣有例尋修竹殘滴
關心到綠苔卜夜未容高士卧釀寒不礙後時開草間絕倒
閒酬酢老瓦盆多當酒杯

米汁亡何獨策勛凋枝病萼各欣欣麴塵漸已霑三徑楓葉
偏先醉十分老圃風光非醅醑夕陽顏色亦醺醺花開說與
園丁道休遣鄰家畢卓聞

十月二十日雪

一晴三十日小雨嫌未深新苗方在野
坵土纔如鍼人情望歲奢未事憂
欽欽良由蓋藏少預恐力不任初寒
澹白日漸已同雲陰夜闌暗鐙幌濁
醪試獨斟沈沈聽不覺但覺萬籟瘖
描畫豐年象鼓盪酒人心一尊亟引
滿感物還沈吟下有滋生麥上有凍
死禽

讀徐文長集輒書其後四首

嚴武胡牀踞尙能一時幕府酒如澠
奇才自合陳東擬疑疾誰言李益應
當代文章歸白鹿百年池館剩青藤
可憐破帽殘衫客別有憂危哭孝陵

狂奴癡叔病兼收厚地高天泣楚囚
骨肉難言人道苦刀錐

求死國醫休鄒陽獄定飛霜下賀監船虛曲水流枉憶柄成

吾手落東西南北旅人愁

安得大柄落我手去覆東西南北之行人文長詠余詩也

水仙留得劫餘灰毛沈紛紛下瀨回上客早驚鸚鵡賦受降
先築髑髏臺未須釣叟牛爲餌劇有佳人鳩作媒記得軍門
行酒日可曾紅粉一低迴

每到奇窮轉近名荆川歎絕鹿門驚感恩狡兔虛三窟流涕
哀猿有四聲一任修元通捷徑斷無封禪媿平生高檐長齒
鄉前輩未必能將此筆爭

朱椒堂京尹寄和對菊詩奉酬二首時冬至後五日矣

黃泥凍拆舊栽盆厝火方溫未翦根兩髯霜華秋剩影一年
花事瓜留痕腰緣負鍤無嫌折酒到殘觴木抵渾僥倖京朝

煩急遞夜深魚鑰振重門

聞說頻年杜老鑱不辭牡鞠與親芟倘翻新樣鄰應妬但嚼
寒香佛亦饒結客尊前誰並秀寄公籬下自非凡醉鄉祇在
青天上慙媿深杯日夕銜

先生二疊前韻
述京邸種花事

秋日卽興二首

老圃多蕭瑟齋餘趁筍將餓狸雙眼碧病樹半身黃土瘠花
難種晴多草亦荒安巢閒鳥雀啁哳費商量
西顥看流火初涼已袂衣老蟬秋榭歇仙風暗廊飛籬蔓先
紅葉墻浩當翠微一般閒況味祇苦酒人稀

訓王子範學博二首

如此才名一第難不隨計吏乞鹿官春風鶚自鳴桑外世事

猴多刺棘端投老風塵虛著腳幾年尊酒許披肝清漳喜與
張周住蠻榼分攜饒歲盤

暫因鎖印過莎庭人日梅花得句成客至面如新釀熟吏閒
身抵紙鳶輕漸聽社鼓催塵上不爲春燈禁夜行薺麥滿田
應一醉升沈姑付外人評

郡城同沈心石

惇厚

趙壽莊

庭椿

章迅齋

雷

蓮亭看花

翠柯高擎百雉城風漪涼浸郭門清始知昨夜匡牀夢菡萏
中間睡到明

直將遶郭傲微之湖雨飛如白鷺鷥苦憶杭州歌水調畫船
吹笛卅年時

官濠租得釣絲過青玉明琅映碧波可惜千霄舊聲價一竿

祇值一錢多

城濠禁漁每一釣竿納賣錢一文

生苦炎歊六月驕天教織蓋護周遭此中不肯低頭者出水爭擎一丈高

空陂蕭瑟晚來波漸近西風放越多一種翛然人外意祇因曾閱熱場過

銷夏灣頭見幾回明璫玉珮與徘徊逢人莫便褰裳去定怕拖泥帶水來

簿領偷閒作俊游行廚拚典篋中裘記來城闕三年醉舊日鳬翁今白頭

捕蝗行

民苦吏如苦蝗苦蝗蝗在田苦吏吏下鄉吏復何所苦捕蝗

使者赫然怒今年河北蝗如烟歡喜不到清漳邊俄聞督郵
來行田誰何一與夫被撲行踉蹌踉蹌踏草根草蟲飛趯趯
督郵大驚訝府縣各奉檄遣員來捕蝗蚱蜢多徬徨虎賁將
軍似中郎前村派民夫後村掘溝畛禾麻離披一網盡老農
揮涕使者哂怒馬如飛報大尹上山斫檀檣檣先殫魯酒味
薄醺邯鄲黠者色然喜一雪鞭背恥捕蝗使者來不止駟馬
路斃田成蹊銜冤一路寒蟄啼百蟲各有辭使者恍聞之早
知一樣付尉羅何不飽喫田間禾

均糧歎

請賑請糶請緩徵請雨不應蝗飛騰魏博少年攘臂起風霆
失嚮蟲薨薨短裝結束夜半出從者相屬如擔簦陶胡奴米

亦易盡所得不過斗與升飢餓重勞縣官怒從此屯聚遂成
蠅忽然大符下鄰邑道將赫怒森威梭剋期三商下村落謂
有從惡宜嚴懲犬牙交錯不百里急裝到及跋烏昇道逢使
者下車揖塵坌滾滾雷憑憑爲言伏莽數百輩未可輕入爭
先登言已躍馬去如駛村南羽騎橫田塍是時曉寒凍林木
霧淞花滿披如繪屋烏未起犬不吠夢魂先被圍層層却呼
伍伯捉者誰主名未有無以鷹長弓大箭且少駐相邀同趁
村門燈此中二百戶有五打門喚起多曹營保甲有冊戶有
口初無所減何有增就中里老年八十對我歎息還拊膺昨
聞前村名捕急中夜誰復辨滔滔婦稚驚走鵲鴨開眼中兵
革經何曾可憐偵伺誰最能少公短簿丞哉丞

聽客述朱文正軼事作

太傅高名壓九州，台垣星象黯然收。
百年性命參同契，一代文章攷異鄴。
自昔甘盤尊舊學，可知仲淹有先憂。
如何挿架書無底，愛託神仙李鄴侯。

隙地

隙地高於阜，閒房小似亭。
鴉歸全樹黑，蛇上一竿青。
伏雨不成潦，孤花如欲零。
祇除鋤草者，竟日少人經。

秋夕後圃卽興

迎涼尋廢院，危磴獨成行。
風過星多響，秋高夜亦明。
勘書嫌月短，謀酒愛碁贏。
不覺忘深漏，階除尙苦蟲。

聞方鐵珊已抵郡城迎之以詩

催租人亦辱鄉枚失喜經年一見纔排日已聞郵吏報隔宵
先與臘醅開竟煩命駕輕千里定許新詩讀百回我似山陰
戴安道知應來是雪同來

貽柴璞厂廣文并示子範

始我未識君晨興會有往解后學舍外闐然見車仗家具頗
無多瑣細到盆盎其他百束縛大與牛腰仿歷此兩塞衛頭
俛不得仰謂是何長物包裹夾土壤初陽照箱底秋氣忽沈
陽殘英尙兩三蒼秀滿輪囷到官有如此風趣已可想過從
數晨夕兄事五年長高貴裝陸賈賜金散疏廣舉杯謝不知
勿爲六鑿攘似聞端居憂酒債不得償一笑姑置之東籬薦
秋爽君自喜孤峭我似適莽蒼似異將毋同會合蓋亦儻歌

詩恥貢諛亦復畏標榜第記下車初其事已無兩却呼王子敬青氍毹坐拊掌

雪菊八首

立冬日小雪庭菊方開同人共賦此詩謂可繼去年醉菊之作僕見獵心喜牽率成詠不自知其老而才盡也

瓶水知寒小霰飛却教陶令覓簑衣正愁遲暮連畦老纔過殘秋一夜肥薙草人來驚爛熳散花天與鬪芳菲水仙祠憶西泠路薦瓊寒泉靜掩扉

粉墨輕彈筆又弓斜川西畔樊川東鈴寒風色飛秋蠹葉落泥痕浣塞鴻別遣鉛華迎朔吹獨將猗潔謝西風最憐蘚石

叢殘外引蔓圓垂枸杞紅

嚴威剛與替餘涼裝點紅茱碧蕙旁薄采已難禁似水白描
誰道不如霜開來笑口春偏小壓到低頭傲未妨却抱冬心
還健者可知此客本非常

尙記錢員外與偕早冬攜得筍皮鞋行畦的樂看無影摘艷
迷離剩有荻吟到一身都是濕賞來十友定言佳臂膊已是
銷寒近肯作重陽一日齋

此花開後又飛花臘鼓還同羯鼓撾祇覺蓬蒿迷舊徑不知
羔酒屬誰家芭蕉葉大畫猶綠皂莢香多醉不沙莫更推敲
爭望見東籬期爾賭尖叉

東郭何曾后土乾崢嶸蕭瑟付園官沾來祇道衣如謝揀後

真愁鬢有潘儘許東人閒自卧但除秋土更誰看一般簪弟
梅兄外先與人閒耐苦寒

同雲似墨麗秋心夜問門前幾尺深瘦影冬堂人厝火疏香
冷局地銷金凍蔬稜外寒如洗折竹聲中艷獨尋比與飴枝
綴溪蓼蕭騷滋味恐難勝

喚起柴桑東後魂瓊思瑤想作黃昏乍教擁簪秋無力欲與
開屏酒不溫簾捲風前愁士女櫓搖霜後指江村絕奇我是
催租吏轉被催詩夜打門

鐵珊自大名回信宿廨後小樓有詩見示次韻

歸來魏博聽車聲坐話疏窗分外清寒約濃陰和月黑雪飛
小片與風平舉杯肯說甜斯下關韻相驚痘亦鳴直爲此樓

東坡全集卷之三
成故事簷前乾離似爭迎

與鐵珊夜話二首

碾盡車前十丈塵爭傳重客叩城闌誰知有鳥還無鳥杜赫
如今亦可人

劇有文名滿外臺脚靴手版恐非才不如鹿布襦衫者飽看
盤鈴傀儡來

與鐵珊話舊累日別後寄懷

湜籍韓門一輩看十年長我笑鹿官論文老覺清狂誤作吏
貧多進退難間地轉成禪自在熱場何似酒將闌征車別後
愁風雪慙媿黃紬擁向寒

西師凱旋紀事三首

蚩尤芒角照軀腰去日高彈古蒯緱正朔三朝甘自外安西
四鎮喜全收雙雕雪獵祈連家萬馬風嘶勃勒秋詔謂將軍
毋黷武梅花羌笛入涼州

歸來勁旅盡三韓領隊威儀宿衛官已許請纓擒頡利何難
賜劍斬樓蘭白翎定倚唐裝聽紅柳爭將漢使看應是聖
恩如挾纊河湟霜重不知寒

萬里遄征過酒泉威弧直到海西天種夷牛馬皆南卧蕃將
貂蟬到左賢供帳亟錮三等賦儲胥增鑄五銖錢漢家不問
逋逃藪始識撐犁覆八埏

夜起作時方患肝疾

棲時聞膈膊醒客厭嚴更樹直月無影葉飛霜有聲轉胞成

小極擁鼻近微明卧起同相笑披衣句未成
肝鬲間何物懸匏未肯容求醫上池水娛老密雲龍已墮張
蒼齒難寬朱邑胸歸心知了義無賴是機鋒

示袁姬二首

澣濯猶煩汝茶爐藥竈旁惟應執虎子似已夢穉郎病自因
人種慵還作佛粧篝燈知句讀行與買巾箱
踐蹠尊前過相期慰白頭厠規石奮巾拂侍裴休節物隨
曹好鄉音付楚咻太常齋日了多事又春筍

酒水二首

上頓偏逢粟列侵黍翁鬱婦可能任頭銜小稱沈酣客骨骸
難爲獨醒心杯底弓蛇和影凍鐙前甕螳抵膠深醉鄉此日

剛三九不釀春陰釀雪陰

朔風凌室夜經過缸面真成古井波有客漫言濡首易此鄉
誰是熱腸多糟牀春小無澆雪枕湯溫不瀉螺欲飲月支
頭盡醉蒲桃紫塞奈寒何

時回部用兵

西域歲事恭紀五首

詔錫春祺溥西征獲鬼章慶成周正朔捷過漢元光頃刻饒
歌競騰驤驛使忙豐貂誰拜賜看煞直廬旁

奏事處接喜報員外郎與保

賞戴

花翎

高廟垂衣日尊親禮數殊典章稽內府顏色奉慈輿
法祖鈞鈐應修儀玉冊俱謁陵還祇告聖孝軼唐虞
當代楊無敵奇勲耀大荒戰酣除夕酒老換塞門霜紀事歸

青史圖形定紫光漢家飛將在曾係幾名王

逆裔恣游奕灰然積石秋生存樓護舌來戴月氏頭使者威

棧到居然潤網收道旁勞騎置親見縛蚩尤時奉檄郡縣差務逆過邯鄲

丞相徵還亟師干過酒泉璽書飛騎出恩讎大官先已築

令居塞應營瀚海田膚功胥膚斷二萬路經年

送漢丈霞司馬從那制軍赴回部

河間司馬戎裝來治河才劇兼邊才薦疏朝入夕報可姓名
高壓單于臺萬騎沙場馳突稀身到河源宦河尾上閑選駿
廐選車葱嶺迢遙視無幾開府者誰文成孫七十叱馭過王
尊出關回鶻爭羅拜百戰威名今尙存叅卿軍事起作色上
馬露布下殺賊却從寶憲勒燕然肯讓張騫矜絕域九重

赫怒驚羌氏白日可揮層冰漸將軍手捉昆侖移賀小諾爾
流向西幕南傳說南冠繫半路先逢凱歌入草荒鳴鏑訓狐
愁巢墮雕翎妖鳥泣書生劍佩珊瑚鉤短後袴裙猩紅兜乳
潼潼帳龜茲女亂定猶彈鈿箜篌爲說準夷戡定始中有貴
族呼衍氏不料高昌似雪霜那堪笑厥如蟲豸逋逃數有葉
爾羌大小和卓恣跳梁苦教瀚海留都尉便絕甌脫作夜郎
純皇奮武彰天罰直埽龍沙洗其窟屬國爭械貳負尸檻
車遠送防風骨百年膏血猶燿燐遺孽乃復稱頭人包胥游
說思存楚簫史徘徊尙在秦四城蹂躪乘無備道是當時竊
據地 聖武方容大宛通廷謨肯議朱厓棄 智勇天錫日
正中桑蔭不移成大功房謀杜斷竟誰是畫室一二臣與同

雲臺諸將誠魁壘開濟還須老成在車師以西于闐東兵後
瘡痍鵠立待鄭重尙書大漠行不同褒鄂事專征刼銷縣圃
仙多感地近耆闍佛亦迎如君幕府文章冠橫截天山作几
案形勝胸中聚米成儲胥腕下量沙算文章有神腕有靈造
福直到南北庭經營要作百世計擘畫應爲九塞型安西何
人負厥職藉口狂王生反側不知薏苡有萋菲但說燕支好
顏色蠡蠹年年釀毒頻一時藩服怨沈淪防邊自古多驕帥
紆策於今有世臣河源使者垂千載謂阿迷達公開府元猷非不
逮遲君却趁驛塵回把酒高談星宿海

南和途次

捷徑三年過衝寒認郭門腴田多鑿井古邑小疑村路怕風

沙擁茶嫌嫩水渾息裝喧爆竹童稚聚黃昏

自唐縣抵柏鄉

凌水冰衝岸寒淞霧作花樓臺山麓寺車騎郭門沙料峭春風近倭遲石逕斜道旁見新柳勞與紀年華

明日立春

過真定觀隆興寺大佛

梵樓上與青天高雲留霧閣結構牢我行過之正冰雪檐鈴亂逐西風塵謂當無遮設廣會天龍帝釋連雕尻誰知少見多所怪陡覺頑軀塞四大重費上徹洞戶深一井旁圍世界隘摩頂放踵始何年百刼前頭弄狡獪五層梯枕登無由出公胯下毋乃羞偃蹇可覺柳生肘欠伸應怕屋打頭修羅臂攘唐宋亂文殊眉歛幽燕愁放腳踏破太行脊開吻吸盡漳

沱流開皇時代成飄瞥鄂國文章字如鐵西風漢殿想銅山
高樹禪關老金穴結跏我欲白佛言但聽佛言不可說噫吁
戲前乎此者不鑄趙平原後乎此者不鑄顏常山觀河皺面
幾回老漳水東流日夜還

滿城至望都二首

乾得車聲似裂霆更無鳴雉入閭聽行人但道春晴好可換
原田薺麥青

爽氣都無隱約聞飛埃如霧障烟鬟半生已被崢嶸誤愛看
模糊沒骨山

雨後花藥翳然有觸而作

幽絃絕危彈卑居遠澆俗歆然無所長亦自靡不足乍幸雨

陽調轉畏暑溽觸處豫泯怨咨養晦節嗜欲新霽得夷曠暫
閒遂瞻矚漸見草木長但聽鳥雀樂種樹競賓友汲井噪童
僕烟涼野氣深日杲芳臭酷勿謂當門多尙恐餘地促張趙
幸勿爲感此還自勗

徐文長畫膽瓶梅花牡丹

自題君臣遇合圖并係以詩
松烟燒得汝窑黃瀋墨開塗

花裡王更配一梢清似
水儼然光武對嚴光

汝州窑勝官與哥頻迦瓶餉春風多鞞紅歐碧自驕貴萬花
俛首還知他畫師畫意不盡似旁着梅花白壓紙嚴光光武
妙比儼奇詭真令俗工死花光月影夜向晨故人同卧驚星
辰懷仁輔義導盛美典謨之外無其倫作者磅礴何胸臆故
紙摩挲生嘆息當時魚水誰最賢相高染翰朝牋天先生捉

刀進白鹿放筆淋漓擲筆哭別將粉本寫瑰奇徐黃區區不
中僕釣臺高出梅花梢不與二十八將爭秋毫羊裘老子好
骨相風雪中見許與巢顛倒拚遭造物怒毀譽紛紛何足數
但使牡丹開早梅開遲人間容有相逢時

中秋夜對月口占

老去韶華黯自憐清輝又照鬢絲邊此情祇有銀蟾見獨倚
闌干十二年

城樓雨望

韓魏蒼茫極望賒麗譙飛雨挾驚沙南浮漳水臺翻雀北走
常山陣起蛇積潦陂田多散雪稔年蕎麥亦爭花閒心鄉國
三千里祇向西風感鬢華

明日晴霽復登城南展眺

不義城闕擁朝霞千里平蕪入望遐上黨寒連三輔色九河
烟動萬人家登臨自媿才難稱撫字生憐髻早華何日拂衣
歸去好老尋谿父話魚鰕

平原行

平原君墓在縣南有祠

死不葬東武城生不填長平坑趙武靈兒乃如此紈袴何足
當秦兵玳簪珠玳門如市食客紛紛日千指但博區區好士
名名固非名士非士上不識趙奢廉頗真將軍下不識毛生
薛生國士存失笑徒遭門下怒乞師還感美人恩真龍却走
凡鱗上大義何曾得髣髴主父殪餓沙邱宮公子當時竟安
往

蓮亭卽目二首

葦風吹得葛衣寒更向尊前舞翠盤
嫌說今年花校少亂翻葉底教人看

晨光亭角尙簫微坐到忘言
豔亦非祇隔玻璃一層水魚兒欲上燕低飛

夜過柴璞厂齋頭看盆桂

金蟾夜齧銅街涼露華洗出明月香
主人延客飛雪黃秋河斜耿蘿門夢青磁曲几妙位置一枝巖桂如人長殘暑已遠
秋自芳氣候亦未憂嚴霜初疑偃蹇或違俗卽之濃馥飄衣
裳乳甌手漉百餅嘗茶味烈與花相當淮南迢遞二千里仙
之人兮來何方天雞欲唱夜未央歸來清夢懷江鄉

坐雨

一庭秋雨日疏疏也學江南繡綠蕪堦下許多閒草木幽禽
爭說去年無

炎埃初滌露初晞高樹鳴蟬亦漸稀一笑青蠅能幾日晚涼
猶趁扇紈飛

見黃葉書感

一葉初黃鵬脚肥墜來籬落見猶稀叢殘梵夾抄經紙黯澹
宮人入道衣菜色幸看如汝少今年甚稔周顒漸覺故交非曼生子修
小糊諸君先後捐館閒庭別有鑒霜樹便到西風肯亂飛

立冬後盆菊有未舒萼者

幾回籬落看花忙直到嚴寒夜有霜刻意尋秋如選佛關心

垂老始開房劇憐畦角黃金賤偏稱尊前白髮狂不是孤高
甘晚出避他風雨過重陽

小除夕次王子範學博漫興韻

駒隙念念又入春頻年河朔歲華新宦隨粥飯緣聊住老覺
窮愁味獨真舊雨相尋催似債東風纔到欸如賓劇憐十二
年前夢已少牀頭貯酒人

春聲校與去年添卧治渾忘節候淹晴坼瓶花新水暖雪銷
隴麥晚風恬贖書俸預明年借窺髻衰防小婦嫌賴有比鄰
好才調安排尊酒約王瞻

除夕次璞厂學博韻

喧呶一例餞餘寒腰帶圍如瘦沈寬婚嫁雖多隨意了湖山

無恙乞身難應劉已逝成飄蒂

謂琴鳴太守小湖茂才

鮑郭相逢剩舞

盤如此流光如此夜黃雞高唱燭花殘

灑埽西頭丈室寬
粃盆酒琰又宵闌
焚黃事幸恩初渥
鐸白方奇驗總難
論齒已容攜
榔栗膠牙聊可具
杯盤明朝約共鞭
春去先著朝衣犯曉寒

奉訓子範見貽之什卽次原韻

搜索虀償隔歲逋
詩筒又報遣長鬚
乍辭舊臘春先到
纔有梅花月不孤
人海歌塲塵障扇
槐街燈市火流珠
新詩莫漫輕相許
驚馬何曾算識塗

次子範新年卽興

客裡逢春不當春
年年贏得二毛新
錢能買夜嫌猶短
酒可

治顰醉始真孤矢已懸偏諱老衣帽可典儘留賓與君都被
桃符笑箇是觀河皺面人

酒畔清愁一昔添試燈風裡幾年淹宦知易退才原拙春到
將濃氣轉恬垂老癡狀何用賣太平沈醉本無嫌騁懷倘逐
登高隊髯也猶能馬首瞻

子範學博三疊前韻見示對雪奉酬并堅元夕之約

粉本天開別樣春祥雲渲染一番新何妨衣袂霑成喜但當
梅花看亦真照夜定愁蟾妬汝埽門如領鶴迎賓先生倘許
衝寒出肯讓山陰訪戴人

鎖印曾無一事添新年居息暫容淹閒多俊味忙方羨睡有
工夫醒亦恬行樂已防兒輩覺看花生恐少年嫌年來記醉

叢臺月漳水蒼茫不可瞻

子範再疊見貽前韻奉酬一首

題襟有約未容逋鬪韻如尋鬪草鬚白髮不知春色到青天
肯放酒星孤逢人怕按尊前劍學佛虛求髻上珠咫尺漳南
銅雀影一時詞賦想當塗

次子範看雪韻效梅都官體

驟暖燒燈節新年局又新晴多天亦老花散佛皆春塾戶坏
應圻茆檐冷獨巡祇除驢背上此事不關民

縣齋無箇事銀海眩窗前折竹響於玉烹茶味過泉書殘溫
越亮樹老醜逾妍暫爾塵氛淨何妨吏亦仙

水仙

洵美藐姑射仙乎仙置幽離騷收未得老圃看誰伴肯許淤泥著無妨瓦礫投種原憑水德開不識春愁小萼重臺賤纖莖一箭抽樣真銀鑿落痕是玉雕鏤自愛冰霜潔偏憐荏苒柔峭寒屏四角初日屋東頭疊疊偎文石微微起淨漚風晴橫棐几香暖近熏篝直欲凌波去翻因顧影留彈琴存髣髴解珮記夷猶澹澹如相接娟娟不可求無人成獨賞入畫定雙鉤破臘過燈市銷閒試茗甌放從殘歲早清亦幾生修比士應稱狷如蘭不在秋與君同臭味吟思滿芳洲

詠宮人入道六首

玉冠初戴倍依依回首龍樓彩伴稀宮扇肯辭鴝鵒影巾箱先疊薜蘿衣臺前鳬舄窺誰是花底羊車夢已非去去但拚

塵劫淨九華春帳侍安妃

蹀躞齋壇日幾回綠陰猶認守宮槐劇憐霄漢長辭輦欲禮
星辰別起臺檀板昨拋金縷去雕籠早爲雪衣開白頭阿監
休懸揣天市從無皂莢來

更休鈴索問頭廳剩有輕塵駐畫幀風暖碧桃開院落夜深
朱鳥近窗櫺內人多乞扶鸞術朝士爭傳相鶴經記得官家
生日近祝釐鐙下寫黃庭

骨出誰憐藥店龍戒香猶帶御爐濃每因膏沐低徊久轉爲
春愁懺悔慵仙犬隔花休吠悅宮鴉歸樹恰聞鐘笑他勅賜
雙飛寺奪婿瑤光亦太憊

對食新從帝子家本師顏色勝流霞騎來狎鳳鸞雛熟學得

瑞簫菊部誇但覺清閒當上藥何曾粗糲笑胡麻玉峯已準
明朝約先看蕃釐觀裡花

自別金鋪日似年蓬萊消息尙茫然仙經校字霜雙鬢弟子
鋤花月一肩櫻筍厨叨中禁賜鐘魚常被內家宣相逢莫替
憂身世省費長門買賦錢

擬唐人貧女和章迅齋大令二首

似水年華過弱齡貧家門巷舊家型牽蘿自補重茆屋引繩
親修汲井瓶但覺糟糠餘臭味肯將脂粉誤娉婷秋來亦有
閒瓜果不拜牽牛織女星

紙閣蘆簾阿母知聰明從古不如癡彩貓傍案愁寒食新燕
窺簾當侍兒腕弱尙抄唐韻賣身涼偏換越衫遲明珠那稱

飛蓬髻休說相逢未嫁時

擬唐人詠公子家

行年二十不知憂
列戟高門最上頭
尙主新恩開別第
同輩半通侯
華燈狎客琵琶夜
紫闥豪家蟋蟀秋
却笑王又謝
苦將餽餼奠清流

轉盼興衰有涕痕
藍田沁水幾家存
綺筵尙剩鮮卑語
朱邸空消劇孟魂
拋盡賜書償白墮
散來歌扇怨黃昏
酒闌那更論塵劫
身是開天一品孫

擬唐人病馬

舊日騰騫苦未能
廊陰鞍瘵欲生蠅
身經百戰癥猶在
骨值千金死亦應
公子多情休換妾
領軍垂老亦成僧
長安不少

珊瑚鞭影日趁看花過五陵

巫馬無由乞禁方一時神駿亦蒼皇聲瘖洱海千重瘡毛裂
渾河六月霜數到同曹多宿草夢來從獵尙長楊而今只戀
閒芻豆羞聽人呼病乘黃

三月十日同人北郭孔寨看花作同柴王二學博

看花却踏漳南春出門撲面飛沙塵欲行不行有夙諾息壤
在彼花應眞輪輕蹄疾騫吁陌油菜初黃薺麥碧廬兒更比
蝶蜂狂隔夜行厨馳似驛天陰噫氣何刁騷初日上與晴燄
塵須臾萬花出迎客風色漸低花光高此時飛騎去如掃欸
段相邀君半道君來我已入花深轉訝行窩遲未到村南村
北聞酒香人家多住花中央沙棠一株獨歎絕壓倒萬樹春

茫茫花魂太重花身仄玉雪一堆扶不得東風著意好擡舉
到此翻嫌無氣力與君酌酒多好顏尋春難得今年閒却教
醉眼看村樹烟痕認作江南山江南迢迢去難必小縣蕭寥
禪處蟲不來花底問流鶯那識清明過幾日樹頭君聽倉庚
鳴大田行且催春耕一杯婪尾各歸去馬後馱花紅入城

過李文屯杏花正盛車中口占

沙塍雨過不飛埃漸近花村漸有苔夾路管絃春女笑滿身
蜂蝶酒人來酣嬉釀合豐年賤負戴場看小市開多事即當
鈴鐸語一羣嬌鳥忽驚回

銷夏漳上精廬效江湖集體

朝朝微雨淨輕埃無事行園日幾回校罷舊書攤罷飯大家

閒話立蒼苔

隔離人影看朦朧
爛熳青紅著色工
我是園翁太僥倖
被他裝作錦屏風

顏色疑從碧落來
牽牛花底小徘徊
似曾記得銀河事
纔見星辰上便開

繫得匏瓜一笑渠
楊然此腹欲何如
老來顛倒生奇想想
乞兒曹貯漢書

芭蕉葉大綠初齊
生愛牆陰濕後泥
却被鴉鉏分植去
雨聲移過紙窗西

周石甫以江陵令調簡入都過邯鄲有詩見寄并約過訪奉酬

汙漢東流入懷抱故人苦向江南老年華三十又六十可憐
尙乞邯鄲道邯鄲琵琶解笑入皮絃乍似雙車輪車輪不可
方風塵幾時了請停鷗鷄絃訴我兩窮鳥謂鳥是鴻鵠仰看
百鳥高飛翔謂鳥是鷦鷯頗亦五色負文章宛頸各悲歎對
酒還摧傷麻衣如雪一揮手一鳥跼跼投湖湘一鳥趁北風
辛苦到河朔醜女幸自免乃亦被謠詠河流何瀾瀾中有武
昌魚荆門巫峽望不極諸宮春色當何如十年閭閻豈不念
老嫗不勝念念書反腰貼地楚舞迴美人餓死章華臺升沈
如此何足論且來酌我三百杯百年鼎鼎已過半雪髯尊前
兒輩看江南舊夢記須與皖公山前石已爛

秋齋雜述五首

啼鴉渴欲瘡百草煨可殲熱毒非自今衰老避無計稍喜訟
庭閒鞢襪嬾不繫行尋後院凉古屋幸未替磚路記曲折軒
新劃如缺階前兩椿樹嚶鳴宛兄弟下有讀書聲籬根送迢
遞

去年結山茨直爲看花亟相期老鄰翁鹿眼著五色不惜青
銅錢乾淨去蔓棘豈知郭橐駝意只在得值灌溉雖萌芽其
根已半蝕春風負擔來轉怪不善殖此手我自有畚鍤固所
識青紅隨臂指况此膏雨力五月已滿籬瓜壺齊結實移牀
就凉陰烹茶坐日昃何來一縷風灑我澹無極若遠若近聞
求之卽不得爲語二三子此是風之德

旣散忽復聚其樂當如何前身老蠹魚坐卧書爲窠飢來捆

載去易米遑知他從此兩眼昏十字恒九訛豈無縣官俸所
苦責償苛長鬚自南至瓊裏羸車馱巾箱四十八一一排嗟
哦譬如頭白鰥忽擁千姪娥驚喜固難狀所惜年蹉跎咿唔
傍漳水銷此髣髴瞢母妄言語恐被先聖訶

侵曉天宇濕殘星沾人衣移牀課花藥涼意含芳菲及此事
漑漑生理通其微萬事早爲貴薄暮知己非戎葵乍衰歇蘿
薦何依依翻翻山葉落習習檐雀飛巡廊闌無人坐久東方
晞披衣索殘帙朝雨初霏微

墻西六枳關野匏陰交垂青蟲齧其葉略似篆畫剗蠕蠕尙
無幾奈何兩廬兒爲藥治所苦乃并葉去之豈不甚快意主
人憎且嘗留此供蠶食何至剩禿枝虬蛇螫其手解腕毋乃

癡疾惡戒太甚曾不知三思客來謂主人意向不在茲此輩
豈能盡盡亦無難孳可惜好匏葉失此新涼時所託一以誤
函葬何足辭

六十初度自述四首適葑湖弟希聲姪各以詩見寄故
末章及之

十年已過杖於家如許流光赴壑蝨齒暮大都爭學佛眼昏
悔不早看花飣盤巧夕瓜猶剩入牕租船酒可賒最是新秋
涼似水舞衣重疊換輕紗

鬚眉如雪映清漳慙媿旁人笑郭郎服散幸教腰腳健買書
姑爲子孫忙向來積習迂難改但得長生老未妨却憶春明
門外路卅年曾逐少年場

耄矣休教感慨多尊前有酒敢知他題襟事往痕如掃舉案

人存髯亦皓

悼亡十年矣

大抵頑仙多邈邈斷無寒女不蹉跎而

今種種顛毛盡乞與頽然側弁俄

同歲無多見苦遲家山回首老茅茨別來居處騎龍尾

余家龍尾

麓記得生年喚虎兒舊句每從僧院覓

西林庵爲同

小名已

少里翁知竹林賴有賢咸籍尚話谿船夜雨時

希聲詩及郡試同舟事

倪子同

承璫

過訪自癸未別於吳下七年矣信宿縣齋

卽送之官西江

記上鮮門五月舩揭來話舊一戰然莫愁手版難爲吏飽看

匡廬已是賢

清才未合老菰廬君又驪歌趁首塗祇恐故鄉漚鷺笑大家

拋卻好西湖

十月三日攜酒就柴學博齋看菊花以詩代簡二首

天寒禁得滿頭霜
開早開遲總未妨
酒價漸低花事好
但攜尊卽算重陽

籬門好傍講堂開
欲趁花陰試綠醅
我是王宏應
送酒可應還約酒人來

題蔣司馬小影

熒臺回首已成煙
痛定難忘小叔年
一抹柳稊新水外
夢痕寫出欲摩天

我謂奇祥不面謾
無勞浪擲酒杯乾
馬周骨相無人識
教向當年火色看

謫謫出出瘖煙飛畫水誠難畫火稀可是江南戴文進防河使者亦紅衣

被薦入都作

又從燕市著征衫世味多嘗尙老饒三輔歲頻調玉燭一官天與換冰銜歌場零落猶揜袖塵海蒼茫又挂帆去覓江亭舊時柳廿年椿祇剩空嵌

趁曉天先火繖遮炎歎如許路猶賒棗陰人影車成市井餘涼聲水當茶畏暑饋多收藥餌倚裝書尙校麻沙老來不解攀鞍慣欸段偷騎試馬撾

嘉慶戊辰禮闈後座師盧相國招同潘冢宰師譙集陶然亭屬屠琴塢太守爲圖揆以不與試辭不赴閱三十

年矣相國出示命題敬次原韻二首

城南尺五許勾留畫裡風光歲月悠車允未能陪末坐歐公
曾此記清游攜來櫻筍春風暖顧後驪黃骨相優多少韓門
賢湜籍迂疏無分屬龍頭

撰杖欣隨造榜天杏花紅過曲江邊扶輿翠卷風前幔倚檻
波牽岸上船老輩題名成故事

國初諸老多
謠集於此

中朝珥筆有華

年江東琨璆羅昭諫轉賴公詩萬口傳

師有手把珊瑚竿
獨掉頭之句

曹河待渡憇僧院聽話方恪敏事

單車衝霧霽欲駛河之湄小約忽中斷坐待方舟櫂驟綱涉
淺去閒讀山寺碑碑長頌功德不如佚事垂公當少賤日獨
漉悲路岐毛羽一憔悴百鳥欺長離造物苟酷毒世俗安足

訾道旁病乘黃况茲風雪采螻蝈走相告幸且潛膚肌徬徨
河水側魚龍多然疑上座何因緣天眼驚其奇解后非故常
變化寧能羈西風吹黃蘗飛上青松枝青松語黃蘗相苦曾
幾時寺門前驅來言禮煨芋師前行導車騎後行擁旌麾執
手語香火感激還涕洟昔來此溝瀆匹夫無人知今來八州
督噴噴誇鬚眉人生際風雲那不生威儀公之治畿甸善政
罄厥施一女或不織萬夫寒無衣一農或不力萬戶多啼飢
公心何竒溫木棉花芳菲公思何纏綿吐作紅蠶絲辛勤教
耕桑百年俗未移師之所呵護甚大匪伊私豈徒以筏喻汲
汲拯其危至今太蘭院莊嚴曜朝曦回頭語僧雛慎勿侮孤
羈

定興弔鹿忠節

鹿公名父子生死託孤城感慨餘文字艱難正甲兵國殤臨
大節黨錮見交情斜日殘鐘外如聞百八聲

公從孫忠烈公於軍中著百八

明皆與公籌兵語

安肅道中

觸熱初程過炎威尙愼旃途衝村是驛縣小菜爲田俯仰看
山色高低任水堦一甌銷渴疾難得淪清泉

與滄州潘雲留刺史同宿白河次日刺史先過河余以
小雨稍遲山水驟至晌午始得渡已距雲留半舍矣

行人投店如到家驪駒飲斲河之涯河底無水風吹沙中有
縵路紆秋蛇棗香酒釀茅檐底呬喔荒雞喚不起俄聞隔院

馬蕭蕭打瓦淋浪雨未已急裝那得矜從容出門路已溝水
衝朦朧略欲辨南北樹影墮落玻璃中昨來親見揚塵大頃
刻魚龍作翻簸吾疑潘侯真健者策騎還穿波底過破船柁
折浮如萍遶岸乃作圉豚行尋常行路尙如此性命直與鷗
鳬爭湍流迅悍長年老酒食錢多還被惱驚定回頭語僕夫
萬事從知須及早

樓桑

已失幢幢影天風暑尙涼村猶留蜀漢蔭或共關張想像高
車蓋飄零古戰場田翁如戴儁閒與話條桑

涿州二首

版泉風色薊邱煙北帝爭雄一代賢賓客欲歸先苑囿干戈

初定已神仙論才歷室寧臺外作偏秦皇漢武前卽墨不降
齊不下千秋遺恨一潸然

七首秦庭亦可羞却將狙擊當奇謀鮑魚肯逐荆高臭駿馬
何煩樂劇收小說直開唐俠客效尤幾殺漢留侯靈狸祇在
昭王家曾見西風易水頭

琉璃河

曉出范陽城先聞流水聲督亢陂高盤遠勢蚩尤霧散開新
晴遶郭二三里宛虹中央橫大同宣府千巘萬嶂攔不住至
此洪流一束天應驚其長不可竟但見瓦屋隔岍秋崢嶸其
直亦如砥奈何百年踏鐵蹴踏低成坑白石何鑿鑿車輪何
轟轟如杵投日起復落如帆側搶頗不平翩如征鳥塌翼過

突如驚獸走壙行，才寸真成屐折齒。拋擲彷彿兒倒鞦，關干石柱不知幾千萬。譬如郵籤一一爲數，長短程枯楊老槐闕人代。儻忽宋遼金元明當時，南北互戰守道旁白骨衰草縈時平。不復設關隘，但有行旅無譏征。過橋下馬讀碑字，滔滔無語歸滄瀛。

雨後望房山

人海勞勞往復還，風塵已媿壯時顏。却看帽影鞭絲外，一行閒雲六聘山。

小西天在翠微端，楚夾千秋闕涅槃。可惜長江狂主簿，浮屠拋却作麤官。

過盧溝橋作

行行到盧溝欲過河無梁匪日河無梁關吏當中央彘彘好
鬚眉肥白頤而長牀上坐箕踞小史三兩行日午始睡起睡
起燕姬旁輪蹄擁街市邢論官與商指揮一舉頤百諾聲雷
硠翩翩雙雕輪敷英坐華妝簾前玉齒舊校上金鳳皇問是
何家世執戟侍中郎從者前致詞慙媿無酒漿明明織女星
迢迢天漢長奈何作虎視眈眈向筐箱車輪卽生翼飛鳥不
敢翔驅之上務去僕御心徊惶側聞御史臺一一登彈章誰
遣魴鯉間不問子與姜紛紛各獸散甚者走且僵我來踵其
後馳驟欣康莊五百青銅錢畧破羞澀囊國門去咫尺譏調
防非常無端恣姦利荒穢飛嚴霜狐兔豈能盡馭之要有方
餓卽縱牙爪飽則旋遠颺取之苟不虐行旅初無傷孰肯舍

分陰角力持短長區區矇瞽言敢以告巖廊

潘芝軒師以和曾賓谷先生寓園賞菊詩見示次韻

芳事稱少年唯此獨稱老白首兩名卿不厭接羅倒尺五城南園到喜退直早繁英雖滿枝零蝶未知好轉惜春風癡有心弄華藻懷哉韓魏公晚節良自保

嘉卉固云好因人成其名黃華倘相失開徑無淵明未必定弃置誰與滋茲堊榻來耀京洛不礙纓紱情朝廷無關失對此心太平豈徒高尙懷始足補蒼英春風氣恒醉秋風氣恒醒

小秀野草堂卷爲顧水部題

秀野先生有草堂畫師移向宣南坊僦居那復論泉石煙墨

結構斜街旁芭蕉葉長雨聲大江南只在闌干外纔到京華
苦憶歸朝參嬾後踈冠帶獻詩修史遭際殊聲價直壓承明
廬當時作達尙如此肯與念念辱簿書江湖廊廟多無妨詩
人恭敬梓與桑就中題者十有九結交相見皆老蒼吾宗太
史餘殘字世好兩家百年值太息巢痕掃已空此段應歸人
海記紅塵擗脚廿載餘重到燕臺事事殊此與遂園修禊外
如今可有禹鴻臚

題顧

元愷

工部小小秀野草堂圖

獨將祖構擅東華秀野行窩接武誇可有比鄰朱十在春陰
吟煞紫藤花

玉山遺事墮秋煙水部才名又卅年紗縠行前汴河水風流

何似小斜川

嘉慶戊辰之夏與張南山同年先後出都今年以卓異入覲乃復相見別已二十五年矣南山爲語令黃梅縣辦水災事出長卷索題

昔別宣武門折柳長安道柳枝裁如人今來大已抱相逢不相識強顏話潦倒聞君一手板牛驥辱同阜幸此蹇蹇懷昂首白日杲當時酒人狂今日循吏老如聞宰相言用之惜不蚤

飢人莫如農溺人莫如吏吏苟不溺人已覺耳目異蒙俱見嬌施人情鮮不忌曾記 膺廟年秋八月望暨過君所賃居一飲盡百器各自稱心言惻然念彫劫美人方滿堂嘲嚙亂

狂議豈知肝鬲語良非酒所被今日乃見之使我媿且悸
皇帝三年春日食民如傷內帑數百萬德意弭災祥君時權
黃梅百里瀕江鄉滔滔江漢流芟芻先修防誰謂縣官小天
怒或可禳人頭何戢戢欲與魚龍翔民悲胥吏喜歲苦胥吏
穰奈何民父母此輩相扶將孑然盪輕舟波浪爲康莊蛟鼉
苟可餌我肉甘且香洪流如可塞我骨堅且強

蟣蝨皆佛子况天生蒸民忽於流離餘殘子生陽春老穉幾
千口就食填城闔里闔死無算人鬼不可分使者雖駢至未
敢勞其賓似有干手眼萬戶爲一身吁嗟鄭俠圖豈尙在古
人中有讀書力匪獨矢勞動作詩質吾友所恐聞者瞋

盧南石副相夫子以松下獨坐圖命題

萬卉不足好，謂其弱且微。豈有一世賢，所託徒芳菲。虬姿道
霄漢，挺生無所依。天地非草草，有此雄且奇。庶幾百代上嘉
憩，留黃扉。奈何韓魏公，但賞金帶圍。

松之德何如，岱頂肆遠攬。力爭巖谷奇，氣壓風雲澹。當其卓
立初，萬象不能撼。澤大靈液滋，根蟠古香醞。愛之孰如公，俯
仰自視欲貌公兼貌松畢，安舍誰敢。

其上栖仙禽，其下施蘿葛。誰云草不殖，疑非荏苒曉。夫子天
人姿，神襟契天矯。磅礴礪礪，何間瀟灑。煙霞表松心，爲我心靜
極。去其擾，但謂聽松風。此事蓋已小。

顧南雅學士仿楊補之梅花卷潘黻庭屬題

楊補之畫丹邱句，復有江南顧阿瑛。苦笑師雄非俊物，却來

渴睡到參橫

墨妙居然一筆成
含毫無限歲寒情
笑來記得秦優語
不許人間禁月明

月底修簫譜爲潘星齋綬庭作

銀蟾唾水涼如雨
霧樹無言倚桂戶
人間何處覓寒簫
吹徹瑤簫月三五
許飛瓊與董雙
成親教紅牙按拍
成說與西風
佳識在霓裳一曲
恰雙聲

王亮生攤書圖

讀書苦不早
老年徒自怍
亮生著作才
鷺島中一鶚
撐腸十萬卷
久已作糟粕
不如姑置之
太多怕穿鑿

文嘉石湖卷

青山如睡起俯仰玻璃天
莫釐縹緲峯堆作花上煙
桃花一路紅湖水相緣沿
過橋定何處未見淨侶延
似聞疏磬聲圓到孤塢顛
依稀寒食過小草抒芳年
軟塵苦炎囂翫此絹素妍
何由漁遂外去趁贛洲船

董琢卿國琛西山紀游畫冊

游事東吳擅拚衝二月寒
徑苔教鷺引廚笋借僧餐
詩骨入山瘦梅花到海寬
西風塵網裡幽夢亦無端

小雪農部招同潘星齋緩庭林小桐集尺五園

出郭先聞菡萏香
紵衣爭與洗塵黃
雨聲已送新秋到
鷗鳥多言昨夜涼
東閣并無行馬設
南皮還許故人狂
念念便作河梁別
未許鱸頭典鷓鴣

羅兩峯畫課詩圖爲周大令作

昏煙涼夜山暝色闕老屋兩峯老畫師崛強肯徇俗獨於賢
婦賢著筆不厭禿彷彿髯桐桂陰承塵有鳴鵬褰帷聞藥香攜
兒就父讀牀頭亂螢飛秋火光景綠相驚是何祥山鬼不用
祝畏其識字多來向蒼頡哭詩教云無邪貞慈罔能觸釵珥
所換書此外亦爛熟昏黃風雨中聲與刀剪續寒燠敢言勞
沈疴起倏忽夫子信學人婦賢比與孰然非韋逞兒渴睡幾
時足此事真可風世以篤行勗於今廢耒耜於古廢蓼兼
之良獨難敬爲文孫告

王子範廣文自河間過訪

欸關來覓舊羊求齒髮蕭殘老亦休千里琴尊漳水夢一燈

風雨博陵秋買山已判成招隱撰杖相扶作俊游獨與信天
緣問訊煙波無恙古瀛洲

見容齋五筆瀛莫間二禽饒
去河間不百里欲以自況耳

病目二首

撩亂空花一夕生非煙非霧忽縱橫且拚怙恨消清晝但覺
模糊困宿醒信耳漸將成老諍看人何取太分明年來百事
曹騰過正怕虛擔察察聲

瑩然無力破虛空漫擬湘東一目同坐上客疑踈箔隔壁間
詩盡碧紗籠悔來溺苦鐙前影大抵清狂酒後風乞得圓光
還了了看花先與約村翁

有觸二首

嘉卉何妨僻處生不爭膏雨不爭晴生憎一種當門草慣要

人擔嫻嫉名

小車間過縣門前秋稼如雪萬陌連笑指稗穉無着處西風
憔悴作荒年

重陽

不沽佳醞不題餽秋句誰爭此日豪辱在泥塗拚送老雖無
風雨罷登高一官陽羨籠中鶴八口於陵井上螯却有差強
人意在燕南八月已持螯

移刺灤州作

蒼茫海色直沽東咫尺泱泱接大風積石西來山已盡塞垣
中斷水連空依然慷慨悲歌俗誰矢饑寒振貸功但使漢廷
多魏尚衰殘何敢薄雲中

癸巳正月二日永平郡城遇趙壽莊大令

曾逐邯鄲道相逢又比鄰名雖慙卓魯交不讓雷陳倉粟空
餘雀民衣敝已鶉艱難頭盡白孤負歲華新

灤州送春詞六首

蕭槭風光過稷辰盧龍塞下草如茵燕山三月春初到青道
怱怱作恨人

石城東畔暖煙微蕭后堽臺燕未飛愁煞長春春淀外柳花
吹滿只孫衣

得得雲駟去未停怱怱驛路此曾經夷齊廟下驅歌過薇蕨
無情不要聽

山海重闔別淚潛東歸有路轉孱顏當門邏卒安橫坐蜂蝶

何由賺出關

江南迢遞惜分攜千里塵氛路易迷縱遣黃鶯多打盡更無
春夢到遼西

老我猶能挈玉壺柘枝舞罷要人扶當筵別有歌三疊芍藥
如盤挿固姑

追悼肩吾仲弟

懃

竟遣奇窮死天涯涕淚餘誰澆趙州土空認秣陵書囊罄休
儒粟薪摧薄笨車迢遙遼海上何計活枯魚
南石橋東地三年宅兆成辛劬宗祏計卧病弟兄情挽紼羣
隣會歌蒿路鬼驚異時誰葬汝遺蛻羽毛輕

枕上口占

修短初無定吾心亦釋然百年誰不朽一病已爭傳鄉國四
千里風塵六十年勞勞謝鷗侶身是信天緣

信天緣鳥名見香祖筆談

寄馬小楣觀察

溪上梅花白當年訪戴行論交然諾重

君曾許刊詩文集

把酒宦遊

輕文字千秋托煙波萬里情平生查與郭君自未渝盟